

ExxonMobil



PNG LNG Envairomen na Sosel Ripot – Namba Wan Hap Bilong Yia 2015

*Energy for the World. Opportunity for Papua New Guinea.
Eneji Bilong Wol. Luksave Bilong Papua Niugini.*





Eksekutiv toktok



“EMPNG i wok long strongim yet pasin bilong wok gut long bungim ol taim ol taget mipela i makim na tenk yu i go long ol wokmanmeri bilong mipela na sapot bilong gavman na ol komyuniti.”

Andrew Barry, Manesing Dairekta, ExxonMobil PNG Limited

Long namba tu hap bilong yia 2015, ExxonMobil PNG Limited (EMPNG) i bin lodim seifli na salim aut 150 LNG kago bilong em bihain long prodaksen i bin stat. Long pinis bilong mun Desemba, 156 kago i bin go aut long ol kastoma long Esia, we 52 bilong ol i bin go aut long namba tu hap bilong yia 2015 yet.

EMPNG i wanpela bisnis han bilong Exxon Mobil Corporation, na em i go pas long mekim wok bilong Papua Niugini Likwifait Niturel Ges (PNG LNG) Projek wantaim ol ko-vensera patna olsem: Oil Search Limited, Kumul Petroleum Holdings Limited, Santos Limited, JX Nippon Oil and Gas Exploration Corporation, Mineral Resources Development Company Limited na Petromin PNG Holdings Limited, wantaim ol wanwok bilong ol.

Dispela PNG LNG Enviromen na Sosel Ripot – Namba Tu Hap Bilong Yia 2015, i givim ripot bilong ol prodaksen wok i bin kamap namel long 1 Julai inap 31 Desemba 2015.

Narapela Enviromen na Sosel Ripot bai toktok long olgeta wok i bin kamap insait long ful yia bilong yia 2016.

Prodaksen

Long taim prodaksen i stat, EMPNG i bin kamapim moa long 11 milien ton LNG long seif rot. Dispela i karamapim tu moa long 3.7 milien ton ol i kamapim long namba tu hap bilong yia 2015.

Long taim bilong stat-ap EMPNG i wok long lukluk long bihainim seif rot bilong lukim olsem ol wok bilong em i ran gut na i ken kamapim moa ges long Hides Ges Kondisening Plent (HGCP) na long LNG Plent.

Konstraksen wok long Pemanen Fasilitis Kompaun i bin pinis long mun Julai na EMPNG manesmen, teknikel, fanksenel sapot na edministresen tim i bin muv i go long dispela fasiliti long mun Ogas. I bin gat wanpela haus bung long tok welkam long ol wokmanmeri long nupela opis bilong ol. Kampani i bin invaitim ol famili bilong ol wokmanmeri long lukluk raun long opis long mun Septemba.

Long pinis bilong mun Desemba, olgeta driling wok long Angore i pinis na ol i stat long rausim driling rig.

Loadim

156

LNG kago

Sefti, helt na sekiuriti

EMPNG i winim wanpela yia we i no bin gat wanpela Lost Time Incident i bin kamap, dispela i skruim rekot bilong em we i no bin gat wanpela Lost Time Incident i kamap long taim prodaksen wok i stat i kam inap nau.

Long taim olgeta tim i traim long winim gol bilong ExxonMobil we 'Nobody Gets Hurt' o i no gat wanpela i painim birua, prodaksen tim bilong kampani i winim 150 de we i no bin gat wanpela rekot bilong bagarap, na Driling ogenaissen i pinisim dispela yia we i gat ripot bilong wanpela bagarap tasol i bin kamap.

Moa long 100 pipel long 20 EMPNG kontrakta kampani i bin stap insait long namba tu Kontrakta Sefti, Sekiuriti, Helt na Envairomen Lidasip woksop bilong yia 2015 long mun Novemba long Pot Mosbi. Het tok bilong dispela woksop, 'Laip Seving Eksen', i lukluk long ol samting ol supavaisa na manesa i mas mekim long taim we i gat ol hai risk samting inap bagarapim sefti long taim bilong wok. Sampela kontrakta i stori long sefti eksperiens bilong ol na i amamas long planti moa samting ol i lainim long EMPNG.

Long Oktoba, Independen Envairomen na Sosel Konsalten bilong Lender Group i ripot olsem okupesanel helt program bilong EMPNG i wok long mekim gutpela wok bikos olgeta mun, ol i save glasim gen dispela okupesanel helt program.

Wanpela kontena wantaim moa long 700 medikol saplai samting i bin kamap long Tari Haus Sik long mun Oktoba na em i wanpela wok bung namel long EMPNG, Tribal Foundation na Project C.U.R.E. Ol medikol saplai i bin gat jeneral sejeri peks, obstetriks saplai, ol baiopsi nil, laboratoris saplai, maikroskop na nebulaisa.



Henova bilong ol medikol saplai (l-r): Sisa Kini, EMPNG Komyuniti Dvelopmen Sapot Manesa; William Bando, Hela Provinsal Edministreta; Lynda Babao O'Neill, First Lady bilong Papua Niugini; Dr Douglas Jackson, Presiden bilong Project C.U.R.E.; na Dr Hamiya Hewali, Tari Haus Sik Sif Eksekutiv Opisa

Dispela donesen i go long Tari Haus Sik i karim kaikai bihain long moa long wan yia wok, i stat long Denver, USA long taim First Lady bilong

Papua Niugini, Lynda Babao O'Neill i bin toktok long wanpela bung bilong Project C.U.R.E. ol i kolim First Ladies Luncheon. Toktok bilong em i bin kamapim moa long PGK4 milien (USD\$1.3 milien) long baim ol medikol ikwipmen na saplai bilong Papua Niugini. Narapela foapela kontena bilong ol medikol saplai bai i go long Daru, Mendi, Lae na Kikori haus sik.

Margaret Maipa Yagas bilong Morobe Provins i winim skolasip bilong EMPNG na Baylor College of Medicine International Pediatric AIDS Initiative, long namba tu hap bilong yia 2015. Dispela skolasip bai baim skul bilong Margaret long kisim Masters in Public Health long University of Texas School of Public Health long Houston, USA.



Margaret Maipa Yagas i kisim skolasip prais bilong em long Deputi Prodaksen Manesa bilong EMPNG, Dale Pittman

Na tu long namba tu hap, Mildred Nigi, bilong Nesenel Kaptial Distrik i kamap namba wan Papua Niugini sitisen long kisim promosen long posisen bilong sekiuriti lidasip. EMPNG i go het yet long apointim ol Papua Niugini sitisen long wok bilong sekiuriti, na i wok wantaim ol komyuniti long daunim ol sekiuriti risk long ol EMPNG wok eria.

Envairomen

Ol baiodaivesti ofset ektiviti bilong EMPNG long namba tu hap i bin lukluk long baiodaivesiti ofset program Komponent 4: Strongim wok bilong ol protektet eria, na Komponent 5: Kamapim ol nupela protektet eria.

Komponent 4 i lukluk long strongim Lake Kutubu Wildlife Management Area (WMA), i stap insait long Apstrim eria. Long namba tu hap, tupela komyuniti-bes woksop i bin kamap long developim ol plen bilong strongim gut Lake Kutubu WMA na luksave long ol wok na trening nid bilong Lake Kutubu WMA Komiti. Ol samting i bin kamap long dispela woksop, em long kamapim ol wok grup insait long Lake Kutubu WMA Komiti na ol plen bilong skruim moa wok bilong strongim ol plen long yia 2016.

700
Medikol saplai
donesen

EMPNG i skruim moa wok long Komponent 5, we i tingting long kamapim nupela komyuniti-bes protektet eria long Apstrim eria we i makim ol baiodaivesiti i bin bagarap long ol wok bilong PNG LNG Projek.

Long namba tu hap bilong yia 2015, ol wok bilong kamapim dispela komponent i bin kamapim ol bung namel long faivpela viles long Kikori delta.

Ol lain i makim EMPNG na ol Viles Liason Opisa i spendim 10-pela de long Kikori delta na toktok wantaim ol komyuniti long tok save long dispela ofset program, wokim profail bilong wan wan viles na mekim ol wok program inap long ol viles komyuniti.



Ol pipel bilong Goare viles i tok gutbai long ol lain bilong EMPNG baiodaivesiti

Komitmen bilong EMPNG long was gut long baiodaivesiti i helpim long painim sampela nupela plent na ol enimal we ol saveman i no bin painim bipo long Papua Niugini.

Eksampel, long taim bilong stadi long dispela pik nus trausel, (*Carettochelys insculpta*) konsevesen projek – Piku Projek – em EMPNG i sapotim, ol risetsa bilong University of Canberra i painim wanpela nupela trausel bilong kolwara em i bilong wanpela kain trausel ol i kolim noten sneping tetel (*Elseya dentate*).

Dispela nupela trausel ol i kolim *Elseya rhodini*, i bilong Chelidae famili bilong ol said-nek trausel i save stap long Saut Amerika, Australia na sampela ailan long Niugini, Timor na Roti.

Indipenden wid odita bilong EMPNG i mekim namba eit enuel wid odit bilong en long mun Novemba. Dispela odit o wok painimaut i soim olsem ol kain kain wid o gras nogut i stap daunbilo long mak bipo long konstraksen wok i stat long olgeta prairoriti eria.

Wanpela eksen plen ol i developim long namba wan hap bilong yia 2015 i kamapim nau gutpela distsas wara kwaliti long ol weist wara tritmen plent long ol hap long Apstrim eria. Dispela plen i lukim ol i senisim weist wara tritmen plent long tripela eria, na ol ikwipmen na senis

long operesen long tripela arapela sait. Ol weist wara tritmen plent opereta tu i bin stap insait long wanpela kompetensi verifikesen na trening program.

EMPNG na ol kontrakta bilong en i kondaktim 28 spil rispons dril long ol ples bilong wok long namba tu hap. Driling ogenaísesen i kamapim 18 bilong ol dispela, na tripela i bin kamap long Apstrim eria na sevenpela i kamap long LNG Plent. Long stat long yia 2015, EMPNG i kondaktim moa long 80 imejensi rispons dril long lukim olsem ol wokmanmeri i kisim stretpela trening na i redi long wanem kain imejensi i kamap.

Wokfos developmen

Ol wokmanmeri bilong EMPNG, i karamapim ol kampani wokman na ol kontrakta, i winim mak bilong 2400 long pinis bilong mun Desemba. Klostu 1900 bilong ol em ol Papua Niugini sitisen inap long 79 pesen bilong olgeta wokmanmeri. Ol meri inap long 25 pesen bilong ol wokmanmeri.

Ol ted pati kontrakta inap long 68 pesen bilong ol prodaksen wokmanmeri. Klostu 89 pesen bilong ol kontrak wokmanmeri em ol Papua Niugini.

Long namba tu hap bilong yia 2015, moa long 43,300 aua i bin go long trening we i karamapim moa long 1300 kos. Samting olsem tri kwata ol wokmanmeri bilong EMPNG na ol kontrakta i kisim trening em ol Papua Niugini sitisen, na 34 pesen bilong ol em ol meri.

Long Ogas, moa long 20 woklain long 11-pela ted pati kontrakta bilong EMPNG i bin stap insait long wanpela envairomen na sosel manesemen trening woksop i bin kamap long Pot Mosbi. Dispela woksop i givim moa trening bilong ol kontrakta long envairomen bilong ol na sosel responsibiliti we i pas long Prodaksen Envairomen na Sosel Manesemen Plen.

Ol wokmanmeri i kisim kalsa trening long ol sait indaksen. Long namba tu hap, ol tok save bilong kalsa awenes bin kamap long 222 sait indaksen. Ol supavaisa i kisim spesel kalsa awenes trening. Long yia 2015, LNG Plent na HGCP i bin lukautim 12 supavaisa kalsa awenes trening sesen.

Namba tri intek bilong 40 Operesens na Mentenens treni, we 12-pela em ol meri, i pinisim nain mun Basic Skills trening long mun Desemba. I bin gat wanpela tred seleksen de long mun Oktoba long helpim ol treni long makim wanem wok ol i laik mekim long operesen, ilektrikel, mekanikel na instramen disaplin. Ol treni i bin stap insait long pesenel ekselens trening we i bin hap bilong faundesen kos wok bilong ol.

79%

prodaksen wokfos em ol Papua Niugini

EMPNG Manesing Dairekta, Andrew Barry, i bin tok amamas long ol treni long taim ol i pinisim Basic Skill trening long wanpela selebresen kaikai i bin kamap long pinis bilong mun Desemba.

Ol treni i wok long mekim eit mun Advanced Skills trening long speselis trening ol yet i makim long Janueri 2016.

EMPNG i kirapim wanpela skills developmen program bilong ilektrikel teknisen, we i wok bung wantaim Don Bosco Technical Institute long Pot Mosbi. Dispela foapela wik program i karamapim ol kain topik olsem seif prektis long taim bilong wok long ilektrikel envairomen, instelesen na testing bilong ol ikwipmen, ilektrikel fitting na testing na inspeksen rikwaimen. Long mun Oktoba, sevenpela ilektrikel teknisen i bin namba wan grup long pinisim dispela nupela trening program. Dispela program i helpim ol dispela teknisen long redi long Papua Niugini ilektrikel laisens eksam.

Sapotim ol Papua Niugini Bisnis

Ol sikispela lenona kampani (Lancos) na 200 non-Lanco Papua Niugini bisnis i givim ol prodaksen sevis i go long EMPNG.

Ol Lanco sevis i karamapim leba haia, mentenens, transpot, fuel distribusen, kotena freiting na vestebel saplai. Ol Non-Lanco Papua Niugini bisnis i givim sevis long sekiuriti, freit na lojistik, transpot bilong karim ol pipel, kaikai saplai, kastoms kliarens, sevei, mentenens saplai, medikol sevis na konstraksen meteriel testing.

Mak bilong mani EMPNG i spendim insait long kantri long ted pati sevis long namba tu hap bilong yia 2015, em i moa long PGK183 milien (US\$61 milien). Long dispela mak, moa long PGK60 milien (US\$20 milien) i bin go long ol Lanco sevis.

Long taim prodaksen i stat i kam inap nau, EMPNG i spendim PGK848 milien (USD\$282 milien) long ol Papua Niugini sevis. Na long dispela, moa long PGK363 milien (USD\$120 milien) em i spendim long ol Lanco.

Long sapot i kam long EMPNG na ol arapela ogenaisesen, Enterprise Centre i winim moa long 3700 trening de long namba tu hap bilong yia 2015. Long pinis bilong Desemba, dispela Centre i bin givim moa long 8100 trening de long yia, em i winim mak bilong 6400 enuel taget.

Long namba tu hap, Centre i bin kondaktim 17 bisnis asesmen, we wanpela bilong ol em i Lanco. EMPNG i bin sponsa long olgeta olsem komitmen bilong kampani long developim ol lokal bisnis.

Long taim dispela Centre i stat long 2010, Enterprise Centre i bin pinisim 395 bisnis asesmen. Em i givim tu samting olsem 20,300 trening de na 1200 edvaisori na stia skul i go long ol Papua Niugini bisnis.



Enterprise Centre tim long Institute of Banking and Business Management opis na trening senta i stap long Pot Mosbi

Sosel developmen

EMPNG i save wok wantaim ol patna long bringim sosel developmen program long lokal na nesenel level. Kampani i bin mekim wanpela tenku yu bung long mun Desemba long luksave long kontribusen bilong ol dispela patna long yia 2015.

EMPNG i givim samting olsem USD\$3.37 milien (PGK10.15 milien) i go long 50 ogenaisesen long ol program i lukluk long helt, edukesen, envairomen, sindaun bilong pipel na iekonomik empawamen bilong ol meri long yia 2015.

Long taim bilong bikpela san na ples drai long Papua Niugini long namba tu hap bilong yia 2015, EMPNG i givim moa long 100 kilolita wara long pulimapim wara teng bilong 11-pela praimer skul na tripela helt klinik, long helpim ol lain husat i kisim taim. Na tu, EMPNG i givim mani long baim moa long 40,000 kilogram rais na i wok patna wantaim Salvation Army long dilim i go aut long ol komyuniti husat i kisim taim long hap bilong Westen Provins. Kampani i givim tu PGK68,500 (USD\$22,776) i go long Uniting Church long wok bilong helpim ol lain i sot long kaikai long Hela Provins.

Insait long yia 2015, EMPNG i helpim 187 haus lain long ol viles i stap long LNG Plent na 10-pela wimens grup long Apstrim eria. Ol i givim teknikel edvais long gutpela rot bilong planim ol kaikai i no inap bagarap long san na ples drai na i givimaut ol sid na han bilong ol kaikai long planim. Na i gat tu program bilong planim ol dispela kaikai.

EMPNG i givim dabol klasrum long Para Praimeri Skul na wanpela nupela haus tisa bilong Baguale Praimeri skul long namba tu hap bilong yia 2015.

PGK183m

spendim insait
long kantri long
namba tu hap
bilong yia 2015

Ol i putim sola panel long haus tisa long Mananda Praimeri skul na Mananda Flexible Open Distance Education Centre i kisim ol nupela desk. Bikos long ol helpim EMPNG i save givim oltaim, Mananda Flexible Open Distance Education Centre i redi nau long kisim ol nupela studen long yia 2016.

Long sapotim Intenesenel Literesi De long 8 Septemba, EMPNG i sponsa long ol edukesen ektiviti i bin kamap long 15 laibreri bilong Buk Bilong Pikinini long Papua Niugini. Ol ektiviti i bin kamap long dispela de em ritim buk, raitim poetri, droim ol piksa na ol kain kain pilai.



Ol pikinini i pilai long Buk Bilong Pikinini laibreri long Koki long taim bilong Intenesenel Literesi De

Moa long 950 studen long ol viles long LNG Plant sait na Apstrim eria komyuniti i bin stap insait long ExxonMobil Science Ambassador program long yia 2015. Long ol dispela studen, 130 studen i bin kam insait long dispela program long namba wan taim tru. Program i bin kamap long namba tu hap bilong yia.

Science Ambassador Program i givim sans long ol studen long pretikel hens-on eksperien long ol saiens subjek na saiens eksperimen na infomesen long ol wok long saiens, teknoloji, ensinia na metametiks.

EMPNG Operesens na Teknikel Manesa, Jeff Ralston, em ol i makim em i kamap Siaman bilong Papua New Guinea University of Technology (Unitech) Industrial Advisory Board for Science and Engineering. Dispela Board i wok tu long stretim gut saiens na ensinia program bilong Unitech olsem bai ol inap long kisim intenesenel stended luksave. Olsem hap kontribusen bilong kampani, EMPNG i givim PGK137,000 (US\$45,553) bilong Ekstenel Eksaminas Sistem we ol eksemina i skelim stended bilong Unitech na asesmen proses wantaim ol intenesenel yunivesiti.

EMPNG i givim tu PGK137,000 (USD\$45,553) i go long Papua Niugini Olimpik Komiti long

Olimpik Velus Edukesen Program bilong en. Dispela program i bilong promotim spot namel long pipel wantaim Olimpik velu bilong soim rispek. Em i karamapim tu program ol i kolim, 'Love Your Coast PNG'. Dispela program i yusim ol biknem spot pilaia long skulim pipel long stretpela pasin bilong rausim ol pipia, ol kain samting olsem sotim ol pipia long pablik spot pilai graun na luksave long ol bagarap plastik i ken kamapim long solwara.

Narapela PGK50,000 (USD\$16,625) kontribusen i bin go long PNG Women in Business Expo i bin kamap namel long 2-12 Julai long Pot Mosbi. Moa long 400 bisnis i bin kamap long dispela bung we XV Pacific Games tu i bin kamap na dispela i givim sans long ol meri long soim ol liklik bisnis na sevis bilong ol na prodak i go long ol ovasis spotmanmeri na ol opisa bilong ol ailan kantri.

Wokbung wantaim ol stekholda na komyuniti

EMPNG komyuniti engesmen program i bin lukluk long sapotim ol wimens grup long Apstrim eria na givim sapot na skul toktok bilong pasin bilong planim ol kaikai long ol komyuniti i stap long LNG Plant sait.

Long namba tu hap, EMPNG i go pas long 460 fomal komyuniti bung insait long 68 komyuniti na i bin gat 3054 infomal bung long 80 komyuniti. Insait long ol dispela bung, i bin gat 14,626 pipel i kamap. Bungim wantaim, i bin gat 1249 fomal komyuniti bung na 6224 infomal bung i bin kamap we moa long 34,500 pipel i bin kamap long ol dispela bung long yia 2015.

EMPNG i bin lukautim samting olsem 250 visita husat i bin go lukluk raun long LNG Plant sait long namba tu hap, dispela i bringim total namba i go antap long 350 long yia 2015. Namel long ol dispela lain em First Lady bilong Papua Niugini, Lynda Babao O'Neill na Papua Niugini Seketeri bilong Dipatmen bilong Komyuniti Dvelopmen, Anna Solomon.

EMPNG Manesing Dairekta, Andrew Barry, i tok kampani i bin gat gutpela yia tru long yia 2015 bikos long hatwok na sapot bilong ol EMPNG wokmanmeri, Gavman bilong Papua Niugini, ol ko-vensera patna, ol saplaia, kontrakta, lenona na o komyuniti insait na arere long prodaksen eria.

"Mipela i welkamim tasol long sans bilong gro wantaim ol pipel bilong Papua Niugini na helpim long bringim ol benefit bilong bihain-taim bilong dispela kantri," em i tok.

34,500+
pipel long
komyuniti
engesmen long
yia 2015

Port Moresby – Project headquarters

ExxonMobil PNG Limited
Jacksons Parade
Port Moresby
National Capital District
Papua New Guinea

GPO Box 118
Port Moresby
National Capital District
Papua New Guinea

Email pnglngproject@exxonmobil.com | Web www.pnglng.com

© ExxonMobil PNG Limited 2016

ExxonMobil

PNG LNG i wok olsem wanpela han kampani bilong ExxonMobil insait long ko-vensa wantaim:



